



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym TAPAK 8

Taruba küm 25 ji India atema kanga tongtibang asütsü: PM Modi

Pierre-Emerick Aubameyang Olympique de Marseille-i ogo



VOL. XX NO. 280 (ADOK 280) DIMAPUR AMUNGNÜ (SUNDAY)

CHITENI (JULY) 23, 2023

₹ 5.00

Gujarat nung lisopurtemi tanü

Manipur atema lungkak aittsü

Ahmedabad, July 22, 2023

(Agencies): Manipur nung kin o kin raraba aser tetsürtem dak tashiyim mapa inyakba anema Gujarat nung Deobarnü lungkak aitba sentong ka agitsü.

Iba sentong ya Gujarat nung lisopurtem aliba tesemtem nung agitsü aser opposition Congress-ia pusema nungittsü telemtetba agiogo.

Adivasi Ekta Manch dena lisopur telok aikati Gujarat nung lisopurtem teimba ser aliba district tem mokdangtsü ayongzükogo.

Deobarnü Gujarat nung lisopur alidak mokdangtsü. Iba ya Manipur nung azütokshiba aser tetsürtem dak tashiyim mapa inyakba, Madhya Pradesh nung natzü naloktsüba aser Gujarat nung lisopurtem

dak tashiyim mapa inyakba anema ayongzük" ta lisopur lennir Praful Vasava-i ashi. Vasava-i tawa tu Aam Aadmi Party (AAP) nungi anena liasü. Iba mokdang ya telok ka mesüra political party ka ajanga masü saka lisopur telok aika mulungtepa ayongzük" ta pai ashi.

"Lisopur telok aikati Centre sorkari Manipur atema mapa meinyakba anema mokdangtsü ayongzük. Parnoki Congress dang iba mokdang nung yariteptsü mepishi aser onoki pusemsü lemtetogo. Manipur nung tensa ya BJP ajanga adokba lir" ta Gujarat Congress spokesperson Manish Doshi-ia ashi.

India nung Scheduled Tribe (ST) nütsüng yongsük 8% shi ka Gujarat nung lir.

Manipur video atema nisung 6 puogo

Guwahati, July 22, 2023

(Agencies): Manipur nung tetsür ana yimjak nung mangsa anir senzüba video ka July 19, 2023 nü prokshiba sülen Manipur police-i bushisüingdanga arudang tanü ano nisung ana puogo.

Tena apuba züngsema tang tashi nung Manipur police-i May 4, 2023 tatalokba dak sendakba nung nisung 6 pua lir. Parnok 6 rongnung kabo tanur lir ta osang angazük.

Brihostibarnü police-i nisung pezü apu aser Hokolbarnü okadak kati parnok anogo 11 police ket nung ayutsü temelaba agütsüogo.

Manipur Police-i iba tatalokba dak sendakba alir ajak aputsü meranger aser parnoki tesem aika mita arudar.

CoTU-i lungkak aittsü

Külen, Committee on Tribal Unity Sadar Hills (CoTU)-ia iba video nung ajemdaker July 24, 2023 nungi lungkak aittsü telemtetba agiogo.

May 4 nü Kuki-Zo tsür ana mangsa anir senzüba aser tashiyim mapa inyakerem ajak

ghonda 48 tsüingda puang ta taoba mapang CoTU-i Centre sorkar nem mapang züngzükja liasü.

CoTU-i züngzüksüba ghonda 48 ji July 22 nikongdang 6:00 ako nung tembangogo.

"Onoki mapang züngzüksüba tsüingda sorkari iba mapa inyaker ajak pua maruteti tembanogo" ta CoTU General Secretary Lamminlun Singsit-ia ashi.

"Tetsür dak tashiyim agi shi nung medemertem süngzü agi alensettsü temerenshi agütsür. Parnok pua arutsü mapang agiba ajanga temeten mangur aser iba ajanga parnok jena aotsü maongka agütsür" ta Singsit-ia metetdaksü.

Iba jagi July 24 nungi onoki Saikul nung lungkak aitba mezüngbuba shilem tenzüksü. Iba sülena onoki akhangba ama meinyakra onok mapa tuluba inyaka aotsü, ta paisa ashi.

CoTU General Secretary-ibo parnoki komala lungkak aitba mapa inyaksü mashi saka osang angazükba agi parnoki National Highway-2 mokdangtsü akok.

Minister Salhoutuono Kruse-i NDPP senden amen

Kohima, July 22, 2023 (TYO):

Horticulture aser Women Resource Development Minister Salhoutuono Kruse-i election nung takok anguba sülen NDPP 8th Western Angami Assembly Constituency den mezüngbuba senden menogo.

Lerie Colony, Kohima nung lar kidang senden amendang Minister Kruse-i NDPP) 8th Western Angami A/C ketdangpurtem aser züngsemtem

dang party tashi itdaksütsü atema meranga inyaksü ayongzük.

Laisa parnok dang tarutsü anogotem nunga la nungita yaritsü mepishiba den election nung takok ngudaksüba atema pelaba metetdaksü.

Chief Minister Neiphu Rio-i la nem Cabinet menden agüja Nagaland nung mezüngbuba tetsür Minister kümdaksüba atema Kruse-isa pelaba ashi.

Opposition MP temi Hombarnü Manipur atema lungkak aittsü

New Delhi, July 22, 2023

(Agencies): Parliament nung Opposition züngsemtemi Hombarnü lungkak aitba sentong ka agitsü sentong renemogo.

Opposition züngsemtemi Parliament nung Manipur tensa atema o atsüteptsü takhangba agüja arur aser iba ajanga senden junga mementeti arur.

Hombarnü parnoki Parliament complex nung Mahatma Gandhi kürakyanglu anasa lungkak aittsü.

I.N.D.I.A. teloktep tentetba opposition party lennirtem Rajya

Sabha nung Leader of Opposition Mallikarjun Kharge indang chamber nung adenshia senden ka amentsü aser Parliament nung inyaksangshia aittsü tebilembatem lemsateptsü ta osang angazük.

Hombarnep 10:00 ako nung parnok senden amenba sülen opposition lennirtemi Parliament telungi maidang tamasa Mahatma Gandhi indang kürakyanglu anasa lungkak aittsü.

Centre sorkari mapang tatsüka atema Manipur tebilemstsü lemsateptsü

mulungogo aser iba atema Union Home Minister-i telangzüba agütsütsü ta parnoki ashi. Ajisüaka Opposition-i tamasa Prime Minister nem iba tebilemstsü onük jembidaksünür.

Opposition-isa mapang telatet makai party ajaki Manipur tebilemstsü atema jembiniür aser Brihostibar nungi Monsoon Session tenzükba nungi iba atema lungkak aita arur.

Manipur tebilemstsü atema opposition aser sorkar tsüingda tekong merangtepba ajanga Lok Sabha aser Rajya Sabha nung mapa kecha meinyakteter.

Nagaland sorkari state atema süoki ia bilemer: Minister Kenye

Kohima, July 22, 2023 (TYO):

Nagaland sorkari state asoshi süoki ia bilemer aser Centre sorkar dang UCC aser Frontier Naga Territory atema tebilemba metetdaksüogo Power & Parliamentary Affairs Minister K G Kenye-ia ashi.

Honibarnü Moluki nung Chakhesang Hoho Kohima (CHK) indang lokti senden nung jembidang "Uniform Civil Code (UCC), Eastern Nagaland Peoples' Organisation (ENPO)-i state balaka meshiba tebilemstsütem den ano tebilemstsü aser onük aika lir" ta Kenye-ia ashi.

Nübertemi bilemba angateta Chief Minister Neiphu Rio-i aniba minister teshimtet telok kati Union Home Minister Amit Shah dang UCC indang jembiogo, ta paisa ashi.

Idangji Amit Shah-i UCC

nung lisopurtem medendaksütsü atema tebilemba aliba metetdaksü.

Constitution nung Arrla 371(A) ajanga state assembly-i ozüing tasen ka meyaglura Naga nunger tamangba yimsü aser sobaliba kümzüka ayur ta Amit Shah-isa ashiba olen Minister Kenye-ia lemsatep.

Centre-i ENPO dang Frontier Naga Territory agütsütsü shidangogo aser iba atema maparen inyakdar. Tang nungi Centre, ENPO aser state sorkar tsüingda iba atema jembitsü, ta paisa metetdaksü.

Naga nunger ajak longjemtsüla aser asenok ajak ajungtsü mechi külemi maparentem inyakyonga aotsü nüngdaker ta Kenye-isa shisem.

Iba sentong nung Civil Administration Works Division (CAWD) & Taxes Advisor

Kudecho Khamo-ia o jembidang sorkar mapa angutsüpurtemi merangtsüla aser mangutsüpurtemi shishilembaba aser entrepreneurship nung ajemoktsüla ta ashi.

"Chakhesang nungeri tesüiba konang nüngsang nung ajemdaker malitsüla saka meyipa reprangshir ochishia mapa inyakerem akümtsüla" ta Leader of NPF Legislature Party & MLA Kuzholuzo Nienu-ia ayongzük.

Naga kintemi Chakhesang nunger ya jembiba ama litetertem ta züngshir anungji iba amaji alitsü merangtsüla, ta paisa ashi.

Independent MLA Dr Neisatuo Mero-ia nübertem dang külemi yaritepa aotsü ayongzük. Paisa Kohima nung aliba Chakhesang nunger dang yimtsüng tulu ka nung alir ama yimjung aser putepa alitsü ayongzük.

Dimapur nung Improvised Traffic Control System tenzüksü



Dimapur, July 22, 2023 (TYO):

Nagaland Police-i National Clean Air Programme (NCAP) kübok Dimapur nung Improvised Traffic Control System (ITCS) tenzüksü.

"Dimapur Commissioner of Police Kevithuto Sophie-i ketdangtsü ITCS mapa inyaker aser kobi melii Nagarjan Police Point aser Holy Cross Police Point nung traffic lights amshitsü" ta Dimapur police PRO & DCP (Crime)-i sangdong ka nung ashi.

Holy Cross Police Point nung

red signal liaka traffic police-i anenang ta meshira Dhobinallah nungi City Tower, City Tower nungi Nyamo Lotha Road aser Nyamo Lotha Road nungi Dhobinallah leni aoba garitembo senzütsü akok.

Kasaji, stop signal agüjaka Nagarjan Road nungi CP Office Road/Railway Station Road, CP Office Road/Railway Station Road nungi Super Market Road aser Super Market Road nungi Nagarjan Road leni aoba garitem senzütsü akok, ta Dimapur traffic police-i

metetdaksüogo.

Dimapur nung traffic control system ya traffic tajungba ketdangtsü atema lir anungji nisung ajaki iba mapa nung yariteptsü mepishir ta parnokisa ashi.

Gari anirtem aser lenmang nung senzüsenbongertemi traffic rules/regulations, traffic signs aser markings meteta alitsüla kechiyong iba ajanga lendong atalokba ajema akümtsü aser traffic system tajungba akümtsü ta Dimapur traffic police-isa metetdaksü.

ADC Longleng-i lenmang shibanga ataba indang metetdaksü

Dimapur, Chiteni/July 22 (TYO): Longleng Additional Deputy Commissioner Alongdhiemen Jamir, NCS-i sangdong ka ajanga, tzunglu aruba ajanga Longleng aser Changtongya na tsungda lenmang kübok tesem aika nung anentsüh alua lir aser ano tesem kar nungbo anentsüh alutsü akok, anungji iba lenmang nung July 23 nü anepdang 6:00 ako

nungi July 24 nü nikongtsütsü 6:00 tashi Light Motor Vehicle (LMV) densema gari kecha ghonda 36 tashi mesenzüi atatsü tetuyuba agütsüogo.

Anungji iba lenmang nung senzusenpongertem dang osang tejangja ka magütsü tashi iba lenmang nung mesenzütsü aser tanga lenmang ajanga senzütsü asoshi ADC-isa metetdaksüogo.

Power Department ajanga PIO shimogo

Dimapur, Chiteni/July 22 (TYO): Right to Information Act, 2004 indang Section 5 & 19 nung shia aliba ama Nagaland sorkari Power Department indang Public Information Authority ama tsunglanglen shia aliba ketdangsürtem shimogo:
1. Appellate Authority:

- Asangla Imti, Commissioner & Secretary
- 2. Public Information Officer: Imliakum, Deputy Secretary
- 3. Assistant Public Information Officer: Tumchobeni Lotha, Under Secretary.

Alisüngkum nüburtemi FAC lenmang nübuttsüka yanglushitsü



Mokokchung, Chiteni/July 22 (TYO): Fazl Ali College asoshi kanga dang tongtipang lenmang ka gari aser nisungtem senzütsü mejungi raksar aliba repringteta tanu iba temeket alir Alisüngkum sector nung alirtemi pei akokba tenla saruteper JCB aser Road roller amshia lenmang nungji ali aser lung inokja nübuttsüka yanglutsüogo.
Iba lenmang ya sorkari

anepalutsüba lenmang ka lir,Fazl Ali College,Cool Creek Hostel aser Staff Quarter nung alirtem aser ano Alisüngkum Sector pur asoshi kanga dang tongtipang lenmang ka lir.

Tang tzungluruwa mapang meyi sodi temer college hostel nung alitsüpur arudang kanga dang timtemteper, ibaji repringteta tanu Alisüngkum Sector puri akokba tashika yanglushitsüogo.

Longleng nung First 1000 Days tenzükogo

Dimapur, Chiteni/July 22 (TYO): District Health Society Longleng ajanga Department of Health and Family Welfare den lungjemer "First 1000 Days" tenzükba sentong ka July 19, 2023 nü CMO Conference Hall, Longleng nung agia liasü, kong tesemdanger tongti ama Deputy Commissioner, Longleng, Dharam Raj, IAS liasü.

1000 ya tetsü aser tanur asoshi anga tongtipang lir, anungji iba mapang temolung agütsütsüla, ta pai ashi.

Pai sorkar den amteper tanur temang anema alitsü asoshi tsürabor aser nüburtem nem pei teinyaktsü angatetdaksütsü ayongzüik.

Iba sentong nung Antenatal, tanur nem vaccine agütsüba, Breastfeeding, Early Childhood Development, Convergence at Village Health Sanitation and Nutrition Day, PMMVY scheme, mezüng anogo 1000 mapang chiyongtsü agütsüba aser SHG ajanga Social and Behavioral Change Communication (SBCC) indang sayua liasü.

Dr. Tiasunep, Chief Medical Officer (CMO), Longleng ajanga tarur pela agizükba o jembi aser PowerPoint presentation ajanga "First 1000 Days" indang lemsatepa liasü.
Pai iba sentong indang nüburtem nem angazükdaksütsü aser nüburtem iba facility agitsü ajungshitsü shia liasü.

Iba sentong ya malnutrition samadaksütsü nükjidong nung lir, koba teblemetsü tulu lir. Chiyongtsü shidak agütsütsü aser temang anema alitsü asoshi tanur sor mezüng anogo

Kasa sentong nung healthcare workers asoshi technical session agia liasü. Sentong nung arogo, wards, PSC, Phomla Hoichem, aser sendaktepa aliba department nung dena liasü.



Mokokchung district nung azünger Unger nung kaketshirtem rongnung HSLC aser HSSLC tatidang nung takok tajung angurtem nem agütsüba konang 'I.Chubawati Ao Educational Trust Award 2023' HSLC tatidang nung takok angur Sp.Talikumzuk Imsong aser HSSLC nung takok angur Sp. Odi Imsong nem agütsüogo. Item konang angurtem den Unger Senso Telongjem Mokokchung, Unger Students' Mokokchung Unit aser Trust board züngsemtem Unger Fellowship Hall nung külemi agiba noksa ka yangi angur. Taküm 2023 agi I.Chubawati Ao Educational Trust Award agütsüba ya tanabuba liasü. Iba sentong ya Unger Students' Mokokchung Unit (USMU)-i anepalur. (Mkg. July 22, 2023)

NDPP-i aibelenertem nem tapet temerenshi agütsütsü mepeshi

Dimapur, Chiteni/July 22 (TYO): Nationalist Democratic Progressive Party (NDPP)-i sangdong ka ajanga, Manipur nung tetsür ana mangsa yimtung süa anir senzüba den mebenshitsü yimya benshiba aser tashiyim agi medemba indang video ka tawa ayimsüng prongkshiba ngua kanga aoksaba aser tetsüba agi asüngba lemsatepogo.

ketdangsürtemi takaratiba nung ochi obendang agütsütsü nüngdaker, ta kasa sangdong ajanga metetdaksü. Iba tatalokba ya meimchir temeden anema inyaksangshiba inyakyim rongnung ka dang lir aser iba ajanga India aser meimchir ajak maksüdaksüogo.

metetdaksü. Maneni NDPP-isa, item tai maketba tetsürtem aser Manipur nung aliba nüburtem, shirnok taoba anogo 70 tashi timtem tekangshi tulu nung lir parnok den tejashi aser timtem lemsatepba metetdaksüogo.

Iba amala meimchir dak mebenshitsüba yimya benshiba ya civilized lokti ka nung kecha jenjang mali aser talisa alima ajunga nung atsüapong mebandangi amshitsüba atema nokdakba mapang ka nung iba amala inyakyim benshiba ya tim masü. Tai maketba tetsür ana hadir tapu balala bener aliba tebur lokti kati mezüngmeshia amshiba ya aitsütsü langa lir aser ken o dak sendaka aliba

Iba dak sendakba nung NDPP-i, India sorkar dang aibelenertem nem temerenshi tesashitiba agütsütsüba dang masü saka nüburtemi maneni temulung lemteta kümdaksütsü asoshi jenjang tapet agitsü aser temzüng ozüing shidak benoka inyaksangshi mesüi aliba tanaben benokshitsü ayongzüikogo. Centre-i Manipur nung tang azütokshi lendong tulu ataloker aliba ya tembangdaksütsü asoshi takokba tashi jenjang agitsüla, ta kasa sangdong ajanga

NDPP-isa, tashiba aser timtem tekangshi nung alirtem den parnok nokdakba lemsatepba den tensa taoba mapang ama süngjema kümdaksütsü asoshi teyari agütsütsü mulunga aliba lemsatepogo.

Kasa sangdong ajangasa NDPP-i, Nagaland nung aliba nüburtem dang Manipur aser lisopurtem sarasadem nung maneni bilemtettsü aser nüngdakba mapang nung temulung ajunga agi bendanga agüja teyari agütsütsü asoshi ayongzüikogo.

PAC-i District Hospital Dimapur asadang



July 21 nü District Hospital Dimapur nung Spot Verifications agiba sülen Public Accounts Committee züngsemtem aser medical ketdangsürtem aser staff tem tangokba noksa nung angur.

Dimapur, Chiteni/July 22 (TYO): Public Accounts Committee-i, 2018-19 küm atema C aser AG. Report of India asadangba dak sendakba nung July 21 nü District Hospital Dimapur nung spot verification ka agiogo.

asahayangtsü, ta ashi.

Maneni pai, Dimapur amala yimti yulu ka nung shirangertem aika anepaluba mapang tetsükdaksü jenti adokaka pei akokba tashi tajungtiba inyaka tensa kanga junga azüokba atema Medical management aser health service agütsür ajak nem tenüngsang agüja liasü.

PAC mendenbuba aser Advisor Agriculture Mhathung Yanthan den team nung Dr. Neisatuo Metro MLA, Y Mankhao Konyak, MLA aser Lima onen Chang MLA nungeri mozükidang facility tem, Medical equipment tem, tel epic

Mozüki semdangba indang osangbenertem den lemsatepba mapang Mhathung yanthan-i, Committee inyakyim tsüngtong oa asadangtsü atema aser iba den ano 2018- 19, C and AG report nung adokba C and AG paras asadangtsü atema mozüki semdangogo, ta ashi.

Mhathung-i, nisung taküm ka nung health service tem koda tongtibang aji temulungdang yur takokba tashi tajungtiba inyaktsü merangtsü asoshi medical staff ajak ajungshia liasü.

Raigad district nung anentsüh lendong nung asür 25 jungogo



July 22, 2023 nü Raigad district kübok Irshalwadi yimdak anentsüh aluba tesem nung NDRF sepaitemi tasü mang bushidang tangokba noksa nung angur.

Raigad, July 22 (Agencies): Maharashtra nung Raigad district kübok Irshalwadi yimdak anentsüh lendong nung asür 25 jungogo; Honibarnüa National Disaster Response Force (NDRF) den ketdangsertemi tasü mang asem ngutetogo.

NDRF ketdangser kati, "Honibarnüa Irshalwadi yimdak anentsüh aluba tesem nung tetsür tasü mang ana den tebur tasü mang ka ngutetogo," ta metetdaksü.

Ibaji densemabo tang tashi nung iba lendong nung asür tasü mang ajak senteper 25 ngutetogo aser maneni samar aliba nisung 83 bushidar, ta pai metetdaksü.

Honibarnü ngutetba tasü mang asemprong maitsü

jangjaogo; arrshi küm 32, Mahi Madhu Tirkat, arrshi küm 50 shi, Aashi Pandurang aser arrshi küm 27 tebur, Kishan Tirkat nung liasü ta jangjaogo, ta ketdangserisa metetdaksü.

Lendong atalokba anogo (July 20) nikongdang tashi nung tasü mang 16 dang nguteta liasü aser Hokolbarnü tasü mang trok ngutet aser tang tasü mang asem angur.

"Honibarnepe-a National Disaster Response Force (NDRF) den sorkar agencies-i asentenshir tasü mang bushi tenzüka liasü. Hokolbar aonung tzunglu kanga aruba ajanga tasü mang bushiba maparen thitema liasü," ta paisa metetdaksü.

July 20, 2023 nü tenemlen

nungi anentsüh tulu anenzüka aluba ajanga yimdak ki 48 nungi ki 17 bo anenbanga liasü.

Raigad district disaster management office ajanga ashiba agi, iba yimdak alir nütsung 229 lir, parnok 25 süogo, 10 yiru, 111 kümzüik aser nisung 83 samar bushidar.

Iba lendong atalokba mapang nung karbo kiyimba benjung kati oor liasü aser kar alui oor liasü.

2014 küm July 30 nü Maharashtra nung Pune district kübok Ambegaon nung anentsüh lendong tulu atalokba sülenbo state nung tang ang anentsüh lendong tulu atalok.

2014 küm iba lendong nungji anentsüh agi ki 50 tashi shi rembanga liasü aser nisung 153 asü.

Opposition MP temi PM nem takhangba agüja longkak aittsü

New Delhi, July 22 (Agencies): Manipur nung tetsür ana mangsa anir senzüba aser Manipur tensa atema opposition party temi Parliament nung o lemteptsü takhangba agütsüba mapang Hombarneü opposition MP temi Parliament kima longkak aita Ato kilonser, Narendra Modi dang iba onük nung sangdong agüjang, ta akhangtsü.

Taküm May ita tetenzülen Manipur nung rara adokba mapang nungi tenzüka Modi-i Manipur tensa atema kecha mejembir, ta Opposition-i aittsü.

Manipur nung tetsür ana mangsa anir senzüba noksa prokshiba sülen ang Modi-i Manipur dak sendakba olen tatsüka jembia liasü.

Parliament nung Modi-i

Manipur atema mejembi ajisüaka tzungluruwa mongpu senden tenzüksü anasa osangbenertem den jembidng pai olen tatsüka jembia liasü.

Pai, "Iba tatalokba ya taaktsüka lir aser iba tatalokba ajanga linük maaksütsüogo," ta ashi.

Osang angazükba agi, tawa opposition party temi tentetba INDIA teloktep nungi lenirtem Rajya Sabha nung Opposition Lenir, Mallikarjun Kharge indang takdang nung Hombarnepe senden amentsü aser maneni Parliament nung jembitsü atema asalentong yanglutsü.

Tan hopta Bengaluru nung Opposition party 26-i INDIA teloktep tenteta liasü.

Hombarnepe 10:00 ako nung senden amenba sülen opposition

lenirtemi Mahatma Gandhi kürakyanglu anasa longkak aita sülen ang House anaprong senden nung adentsü.

Centre sorkari Manipur tensa atema mapang tatsüka o lemteptsü melungogo. Union Home Minister, Amit Shah-i, sorkari Manipur atema jembitsü melunga lir, ajisüaka Opposition-i Ato kilonseri tama sangdong ka agütsütsüla, ta tekong meranga akhanger, ta metetdaksü.

Amit Shah-isa, opposition-i mapang telatet makai party ajak nem jembidaksütsü atema temelaba agütsütsü akhanger, ta metetdaksü.

Manipur onük dak sendakba nung mangatetep adoka tang tashi House anaprongla nung senden junga mekateter.



July 22, 2023 nü Chennai nung IIT Madras 60buba Convocation nung Chief Justice of India, Justice D.Y. Chandrachud-i jembi noksa nung angur.



A Public Invitation

to be a part of the
Solidarity and Prayer Watch For Manipur
Sunday, 23 July, 2023

Venue : City Square, Chümoukedima
Time : 4:00 PM

Leader: Rev. Dr. Ellen K Jamir
Pianist: Thejakhrieno Kuotsu
Cantor: H. Mosohrii

- Reading of God's Word and Prayer : Rev. Moses Murry
- Solidarity Word : Niketu Iralu
- Special number : Pastor M. Omega and Lamneiphah Khongsai
- Readings : Forum for Naga Reconciliation
- Remembering Manipur : *Nearer, My God, to Thee*
- Congregation Song : Rev. Dr. Heni Gedeon
- Benediction

Organized by the Forum for Naga Reconciliation in Cooperation with Nagaland Joint Christian Forum, Fellowship of Naga Baptist Churches & Chumoukedima Town Pastors' Fellowship.

HOMI BHABHA CENTRE FOR SCIENCE EDUCATION TATA INSTITUTE OF FUNDAMENTAL RESEARCH

Astronomy, Biology, Chemistry, Physics, Junior Science aser Mathematics indang National Olympiad Programme 2023-2024 agitsü.

Iba sentong nung shilem agitsü janngar kaketshirtemi **November 25 aser 26, 2023** anogotem nung **National Standard Examinations (NSEs)** (science subjects atema) tatidang agütsütsüla aser **September 3, 2023** anogo nung **Indian Olympiad Qualifier in Mathematics (IOQM)** (Mathematics atema) tatidang agütsütsüla. **2024 International Olympiads** nung shilem agitsü atema mezüngbuba meraji NSE/IOQM nung qualify asütsüla.

Kaketshirtem atema online enrollment:
IOQM: <https://www.mtai.org.in> (**July 10 - Aug 3, 2023**)
NSEs: <https://www.iapt.org.in> (**Aug 21 - Sep 14, 2023**)
For more details: <https://olympiads.hbcse.tifr.res.in>
<https://www.iapt.org.in> <https://www.mtai.org.in>
CBC 48143/12/0001/2324

Taruba küm 25 ji India atema kanga tongtibang asütsü: PM Modi



jenjang tasembuba asütsü ta ashir. Iba tetezü mapa maongka aser sensotem per capita income teimba akümsü," ta pai ashi.

Yaküm October 22 nü 'Rozgar Mela' mezüngbuba shilem tenzüka liasü.

"Azadi ka Amrit Mahotsav' mapang nung linük terenlok lenmang nung jajaba mapang ka nung sorkar tenzüksü atema nenoki maongka angubaji akhümket kanga tulu. Iba linük nüburtemi India ya terenlok linük ka küm daksütsü bangjemogo. Taruba küm 25 ji India atema kanga tongtibang asütsü," ta pai ashi.

Tang tasen mapa nung shimmertemji sorkar ministries aser departments balala nung shimmer; item rongnung Department of Revenue, Department of Financial Services, Department of Posts, Department of School Education, Department of Higher Education, Ministry of Defence, Ministry of Health & Family Welfare, Central Public Sector Undertakings, Department of Water Resources, Department of Personnel & Training aser Ministry of Home Affairs densema lir.

New Delhi, Chiteni/July 22 (Agencies): Honibarnü Ato kilonser, Narendra Modi-i tang mapa nung shimoker tasenpurtem nem appointment shidi 70,000 dak tema agütsü aser pai video conferencing ajanga parnok den jembi.

Tang tasen shimokertemji central sorkar departments, state sorkartem aser Union Territories nung mapa tazüng atema shimokertem lir.

Rozgar Mela sentong nungji jembidang Modi-i, "July 22, 1947 nü Constituent Assembly-i linük wako agizük. Iba anogo nungji tang tasenpurtem nem mapa nung shimba shidi agütsür," ta ashi.

Paisa, taruba küm 25 ji India atema kanga tongtibang asütsü, ta ashi.

"Tanübo mongintemi, taruba küm ishika tsünga India ya alima nung rongsenketzüng jenjang tulutibattem rongnung



TIR YIMYIM

YIMOBILEM (EDITORIAL)

DIMAPUR

AMUNGNÜ

CHITENI 23, 2023

AmongnÜ

Tang alima nung alir meimchirtem ajaki liromedema amshiba mapang aser anogo azüngba zünya nung anogo 365 agi küm ka ajunger. Tetezü küm ka nung amang 365 lir aser yamaji 365 ben sangwar. Iba kijaji bilemdangra tesüngmangtsüka lir. Nisung tashi agi iba sangwa aser amangji kata sota ayutsü makok. Aji oda, sangwa ken aser amang ken ta mapang süitema aodang, mapang aser anogo azüngtsü atema nisungi second, minute, ghonda, anogo, hopta aser ita ta shitak-shitak lemsar sükdangtetsüsa inyaktetba nisunger kolokjia kanga tulu liasü ta angateter. Tsüngremi alima yanglur külena tanü asenoki ita anogo azüngba amai azüngtsüsa kenpigabo amang aser sangwa maliasü. Tetezü alima nung anogo maliasü, kechiyong alima ajak tammang liasü saka kodang Tsüngremi tesangwa adokdaksü aser tesangwaji amang den mapang kasasa asütsüsa sadangtsü, iba mapangba nung jagiang alima nung anogo ka, ana aser asem ta azüngtsü tenzük. Aji oda, Tsüngremi kodang tesangwa dang anogo aser amang dang anung ta jatetsü, iba mapangji alima nung anogo mezüng nü liasü. Iba mezüng anogo nung Tsüngrema koda pelar alitsü ta bilemer. Iba anogo mezüng nü nung jagi tenzüka Tsüngremi anogo azüngtsü tenzük aser anogo trok nü agia anüng, tzüym aser ali takong aser yangji taküm aliba kechisarina ajak yanglur külen tenetbuba nung Pai yangluba kechisarina madak anisüngzüka mongzük. Aji oda, Tsüngremi anüng-ali aser yangji kechisarina poktetdakja inyakdang, anogo trok agir tenetbuba anisüngzük amongba kasa anogo tenet agi tanü lima nunga hopta ka shitak küma sükdangteta züngshiba mapa ya tesüngmangtsüka lir. Aji oda, tanü lima nung tang asenoki sükdanga amshiba mapang anogo ya, tatishitsü agi, anogo pongo agi hopta ka küma sükdangtet asübo, Tsüngremi inyakba ama, anogo trok nü mapa inyaka monger anogo tenetbuba nung asenoka anisüngzüka amongtsüsa mapang shitak metenjitepla ta bilemer. Atangji, anogo trok lir tenetnübuba nung among amongtsüba ya Tsüngrem dak amangertem asoshibo ozüng lir. Ibai Tsüngremi Mosa ajanga Israel nunger nem agütsüba ozüng ter rongnung ka liasü. Laishiba nung yamai zülur lir, " Amung nü meshiteta mongang, anogo trok nü tasena mapa ajak inyaka mongang, saka anogo tenetnübubajibo Kibuba nü Tsüngrem among nü lir." Aji oda, iba anogo nungbo nisung dang masü shirurua dena mapa meinyakdaksütsü asoshi ozüngsa lateta yuja lir. Ibayongji, tanü asenoki anogo tenetnübuba shia among amonger. AmungnÜ tetezü anisüngzükba anogo ta angateter. Ajisüaka, Tsüngrem dak amangertem asoshibo anisüngzüka amui oa amongba anogo kabo masü. Temang shi nung anisüngzüka amongtsü atemabo mashi anogo ka nung mongtet, saka anisüngzüka amongtsü asoshia kechiba anogo tenetbuba nungang amongtsüla ta sarasadema bilemdangtsübajiji tuluka adoker. Tanübo, mapa anogo trok nü inyaker tenetbuba nung anisüngzüka among amongba yabo tanga alima tsüngrem dak amangertem ajaki amonger. Parnok asoshibo iba amongnÜ ya temeshi anogo masü saka südoksünema amongba anogo ka dang lir. Tsüngrem dak amanger o mamanger na tsüngda among nü amongba tepilaji ibaji asütsü. Atangji, amungnÜ ya kecha meinyaki anisüngzüka amongba anogo, saka lumiba anogo kabo masü, anungji chiajema anisüngzüka amongtsübajiji jangratemtsüka lir. Iba ama anisüngzüka amongba anogo nung tamangertem asoshi jangratemtsü kaji tenla kidang külemi senteper Tsüngrem nem tetushi agüja külemba ya lir. Atangji, sentepi aoba kija agibo kotaki moutetsü saka sentep kidang amongba purtem ajak külemi longjemer tenüngsang agüja Tsüngrem külema tushiba agi Pa pelar. Aji oda, Laishibaisa ashir, Tsüngrem peladaksüba nungi asenok tashi angur.

OLEMSABANG

Ao oshi koda tobur tajung

N. Imtatsüng Imchen, Associate Pastor, DABA

(Yashi adok nungi...)

Koda Tobur Tajung :

Ajak asoshi kechi tapet aser kechi agi ajungtsü item ajakji jungjunga asadanger ang teyanglur Kibubai nisung ajak nem agütsü aser ibaji Tsüngremi lemzüktsüba maongka tulu lir. Temeshi Laishiba tesayubaji 'Na kechi aka aji agi temulung süang' ta shia lir, yamaji asenok asoshi asen yari kechi tapet ibaji Kiburi kanga dang mulungsowa agütsü. Pei tetsü oshi koda tobur tajung aser ya asen dak apet tajungtiba sobutsü ta angateter, aser ibai tesüngmangtsü temoatsü tulu tebang agi jembir mejembimaba shilem ta züngshidi. Tapet nisung nem tapet mapang nung Kibubai asen nem agütsüba oshiji "Ao" o ya lira ser iba oshi ya asenok asoshi alima nung tobur tajungtiba.

Ao oshi ya kanga dang takar aser tobur tajung, tatishitsü agi "Nisung Temang" nung keta aliba tenük-telen nüngja-koja ajak ya Ao oshi agi koda tesüngmangtsüka 'T' agi tenzüka lir : Tekolak, Tekolok, Tekung, Tezüng, Tenük, Tenarong, Teni, Tebang, Tepangkep, Tepu, Tepuni, Temeli, Tejak, Teku, Tapobang, Teben, Teküp, Teka, Temeyong, Temezüng, Tezü, Terok, Tangula, Tepok, Tesaret, Temesen, Tezüngjang, Tar, Tebin, Teba, Tepokpok, Tasü, Temulungjang, Tebela, Tetsüng, Telongpo, Tebi, Temokok, Temein, Temeba, Temesüla, Tenüklang, Tsüngpok, yamala.

Ano 'M' agi tenzükbatem Meinyaktet, Motet, Mepaidoktet, Mejangjatet, Melitet, Mejembitet, Manüngzük, Malutet, Memejangtet, Mekazütet, Mazüoktet, Mebilemtet, Mebilemjem, Menüngdaker, Maruteter, Maritokteter, Majashidaksüner, Merajem, Mashimalu, Metokmeberi, Mekokmein, Marakzüteter, Meyokteter, Merajemteter, Mapusoteter, Memerükteter, Majangteter, Menokdangteter, Maremteter, Mepilanür, ano aika dang bendenloktsü akok.

Tasüngtet aser Temerük :

Ao oshi tasüngtet aser temerük kechiaser otsüla obola nunger mapang nungi ken aser o agi jembia kanga asüngteta lia aru. Par putu mapang benjongbentsü aser lokti senden ajak nung kensü ola tajung agi jembitepba temoatsütem lemsatet. Asen tetsü tebu oshiben tajung kümtet-kümteta temulungjang tindang agi anüng ali yanglusang Tsüngremi kechi oshi tajung moatsü iba dak ajemdaker sobaliba aru. Khenyongi asüngtet asüngteta kenshi-oshi temerük agi jayajako shidak jatepba kin kidong latet-lateta koba mapang nung kechi koma jembitsü aser kechi ken agi shir den tongteprateptsü item ajakji par mulungjang nung tenok-tenoka yua liasü. Kaket reju nung kaket shisatsü tajung tulu temetetba meliaka par mapang kanga dang tasüngtet aser temerük taküm nung libalirua tetezü tajung nung senti taküm litet.

O tempang :

Ao oshi koda tobur tajung aser jangratemtsü, iba ya kecha dena metemdangtsü makokba Tsüngremer shilem. Alima nung libaliru kechisarna melenshia ao-er aser tensa mapang den apet itemji inyaker, yamaji alima tejakleni aoba medem oshi-oben tobur tajungba tabensaba jembitsü koda tajung. Pei oshi senzüka metoktsüi metsünga-reta wazüka ayutsü aser tangatetba tajung yur tarutsü lanu putu asoshi pei oshi (Ao oshi) dak temulung agütsütsü kanga tongtipang ta tangatetba nung iba oset ajanga lemsatetper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



ABAM WM ajanga ayonga Sintiki training Zone 6 & 7, July 17-21, 2023 tashi Impur nung kanga takok ngua agiogo. Ajak agi Arogo pongu nungi parnok 10 iba training nung aden. Iba training nung lon tabu balala, cake, amtsük, sapon tabu balala, detergent powder aser suoshi mejepa arba sayua liasu. Training nung tesayurtem, Mrs. Alemla Samuel, Naga United, Ms. Asenla ICH, Impur, Ms. Imtirenla L.Lemtur, Sünkomen aser Ms. Maclean, Dimapur liasü.

Armenia nunger Khristantem meshimeshia samatsütsü meranger

July 22, 2023: Armenia aser Azerbaijan na tsüngda raraba ajanga arrtsülen alir Khristantem samatsüsa tensa ka nung lir, ta meimchir temeden atema inyakertemi metetdaksü.

Muslim nunger nütsüng tiemba aliba Azerbaijan-i Armenia anema rarar aser tang tesüsa Nagorno-Karabakh region mokdangba ya Khristan linük nung Khristantem meshimeshia samatsütsü nükjidong nung inyakba lir, ta taoba mapang ambassador-at-large for international religious freedom, Sam Brownback-i metetdaksü.

July 18 nü Brownback-i sangdong ka ajanga Armenia nunger Khristantem atema tebilemtsü katsüba lemsatop. Tawa pai Khristan temeden atema inyakba telok- Philos Project den külemi Armenia semdanga liasü.

Brownback-i, "Turkey-i pusema Azerbaijan-i tanemtanemi Nagorno-Karabakh region kangshidaksüdar. Armenia nunger Khristantem meindoktsü nükjidong nung parnok Nagorno-Karabakh region ya nisungi melitetsüsa tesem ka kümdaktsütsü meranger," ta ashi.

Paisa, US-i tiyongtsüü aita meinyakra akhidang Khristantem pei lima nungi aotsüsa akümba ama ano ataloktsü, ta ashi.

Brownback-isa Congress dang Nagorno-Karabakh nung Khristantem kümzüksü atema "Nagorno-Karabakh Human Rights Act" agizüksüla, ta ashi.

Paisa US dang tamalen Azerbaijan anema tenokdangba agütsüba ama maneni tenokdangba balala benoktsüla, ta ashi.

Nütsüng million 2.8 aliba Armenia linük nung nütsüng shilem 90 bo Khristantem lir, ta 2019 küm U.S. State

Department-i metetdakja liasü.

Soviet Union chirepba sülen 1990s nungi Azerbaijan aser Armenia napronglai Nagorno-Karabakh region raktepa rarar.

Taoba mapang Soviet state anapronglai iba region raktepa ajanga 1994 küm Nagorno-Karabakh War adoka liasü, iba sülen Armenia-i iba region agi.

2020 küm September ita nung Azerbaijan sepaitemi iba region azüoktsü atema inyakba ajanga linük ana tsüngda rara adoka liasü. Ita ana shi raraba sülen November ita nung Russia-ketdangsüa yimjung atema inyakba ajanga rara anena liasü.

Population Research & Policy Review ajanga ashiba agi, 2020 küm rara nungji Armenia nunger 3,822 asü aser Azerbaijan nunger 2,906 asü.

Iba rara sülen Azerbaijan-i iba region nung tesem tuluka atsünga agiba sülen mokdanga liasü. Joko Armenia nunger

Nagorno-Karabakh-i aotsü atema tesem tilaka dang lir aser iba dangji "Lachin corridor" ta ajar.

Yamaji tang Azerbaijani nungeri Lachin corridor nokdangba ajanga Nagorno-Karabakh nung Armenia nunger Khristantem kanga timtemer.

"Iba tensa ya kanga rongdak kümogo. Aso ka tsüngda tang agi tanabenbuba Khristan linük tejentiba nung nisung jenti tepsettsüsa tensa ka nung lir," ta Philos Project Tir, Robert Nicholson-i ashi.

Ottoman yimli mapang nunga Armenia nunger million 1.5 shi tepseta liasü.

Paisa, "March ita nungi iba region-i natural gas den electricity ama tanga energy balala bener mouteter. Kibongtem pilaogo aser surgery magiteter. Tang Nagorno-Karabakh nung nisung 1,20,000-i teyari kanga nüngdaker," ta metetdaksü.

Alimai ola madokba agi Nigeria nung Khristantem jenti tepseter

Washington, July 22 (Agencies): Mongolbarnü (July 18) Nigeria nunger tongti putir kati U.S. congressional sub-committee dang, Nigeria sorkar aser alima linüktemi ola madokba agi Nigeria nung Khristantem jenti tepseter, ta metetdaksü.

House Foreign Affairs Committee kübok Subcommittee on Global Health, Global Human Rights aser International Organizations-i "Alima tesem ajaklen tamangba yimsü temeden" indang onüktem angadanga liasü. Iba sentong nungji Nigeria nung Benue state kübok Makurdi nung Roman Catholic Arogo nung tongti putir, Winfred Anagbe-i par Arogo nung Khristantem aika tepsetba osang metetdaksütsü liasü saka pa iba sentong nungji medentet.

Ajisüaka pai iba osangji osangbenertem den lemsatop. "Joko mapang talangka Islamic kiralongrartemi amakdang Khristan meyirjang aika tepsetba dang masü saka million aika jenshia Benue state tesem balala nung aliba camps nung jenoka lir," ta pai metetdaksü. "Tesem kar nungbo schools, clinics, Tenla kitem aser markets ajak raksatsüogo. 2014 küm ni tongti putir akümba mapang nungi tenzüka ni ayimjemba tesem aika Islamic kiralongrartemi atsüngadokogo aser Arogo 14 bo samaogo," ta pai metetdaksü. Anagbe-isa, 2009 küm nungi tenzüka Benue state nung nisung jenti tepsetba, kiralongrartemi ali atsünga agiba aser nisung aika jenshiba osang tejangja metetdaksü. 2014 küm nungi tenzüka Benue state nung Arogo

züngsemtem aika samaogo, ta pai ashi.

"Mashisa tetsürtem aser tanurtem densema nisung aika tepsetba aser parnok li atsünga agiba ajanga rongsenkettsüng dak sendakba maparen ajak anenadokogo, aser iba ya Nigeria tesem balala nung Boko Haram densema Jidad telok balala ajanga lir," ta Anagbe-i ashi.

Joko tesüiba küm aika meimchir temden atema inyakertem aser Nigeria nunger Khristan lenirtemi Nigeria kübok Middle Belt state tem nung nisung meyirjang aika tepsetba atema tebilemtsü kaa lemsateper.

Khristan lenirtemibo yimsü nung ajemdaker Khristantem amaker ta ashir, ajisüaka Nigeria sorkaribo akhidang nungi aluyimertem (Khristantem) aser shiruru

mesürtem (Muslim) tsüngda rarar, ta ashir. Paisa, UN Office on Genocide Prevention & Responsibility dang, "Nisung jenti tepset tenzüka sülen nungi aibelenertem anema kecha meinyaker. Ozü linük sorkari nisung tepsetba nokdangtsü atema kecha meinyaker. Onok timtem atema sorkar aser alima tesem balala nung lenirtemi ola madokba ajanga, 'ola madokba ya Benue state aser Nigeria tesem balala nung Islamic kiralongrartem parnok sünütsü sūdaksütsü atema inyakba asalentong lir' ta ni bilemer," ta ashi.

ANO GO ABEN TSÜNGREM DEN

Teti aliba yimlibilem

-T. Ken 136:1-9.

T. Ken 136 nung Tsüngrem yimlibilem uluba indang ashir, "kechiyong Pa yimlibilem teti alir". Yihuda nunger iba ken teti tekülemdak aten. Putir telok kati ashitsü, "Oh, Kibuba nem tenüngsang agüjang kechiyong pa tajung lir!" (t.1). Idangji Putir telok kati langzütsü, "Kechiyong Pa yimlibilem teti alir".

Yimlibilem aser taochi teti külemi aor. Tsüngremi Pa yimlibilem agi kü dak malangba kü nem agütsür, aser Tsüngremi, Pa yimlibilem nung kü dak alangba magütsür. Pa yimlibilem teti alir, aser asenok telangzübaji tenüngsang agütsüba aser tetushi asütsüla.

Pa tesüngmangtsütem asoshi Kibuba tenüng sangang. "Sayatenya tulu Pa mesüngi dang inyaker, Pa sangang" (t.4). "Pa tenüng Tesüngmangtsü ta ajatsü" (Isa.9:6). Yisu Khristai ashi aser Tesüngmangtsü mapatem inyak. Kodang Tsüngrem taküm ka nung tangshidir, ibai tesüngmangtsü agi asünger. Peter, Andrea, Yakob aser Yohan- Parnoki Yisu majurui dang ali asübo parnok tilar nisung angu purtem dang lila. Parnok Kana yimdak Kiyir benjung kati ao, aser tesüngmangtsü atalok. Parnok tasüdaki ao, aser tesüngmangtsü adalok.

Pa shisatsü asoshi Tsüngrem tenüng sangang "Shiba shisatsü agi anüngtem yanglu Pa sangang" (t.5). Tsüngrem shibai alima ajunga yanglu, ibai azüoktsü Pa shisatsü kar, aser na ne taküm asoshi nüngdak shisatsü Pa kar. "Nenok rongnung kar shisatsü agi anünga lira, Pai Tsüngrem dang meshidakjang" (Yakob. 1:5). Pai na anitsü.

Pa asoshi pa tenüng sangang. "Shibai tzü manung alima sataka yanglu Pa sangang" (t.6). Pa tesüngmangtsü mapatem asoshi asenoki Tsüngrem tenüng sangdi. Asenoki Pa linüba bushidi kechiaser pa shisa taka. Pa teyangluba ajanga Pai agütsüba ajak asoshi Pa tenüng sangdi.

Tsüngremi yimli mebilem asübo aser taochi maka asübo na mekümsüki lila. Iba sempet ana odang agüjadok ta tagi. Pai na asoshi kechi agütsü iba asoshi nai Pa asangtsü mapang bendanga agütsüdar ma? Aser Pai na asoshi inyakba asoshi pa sangdagi ma?

AO OSHI ANGAZÜKDAK:
TANÜ ANGAZÜKTSÜBA OJANG



Reptet

- (v) o jangjangjaa adoka jembi (clear voice)
- * America nungertemibo o reptet-repteta jembir.

Reptok

- (v) sü mesüra süngo tu agi merüktetba (sweep or clean with leaves or clothes)
- * Temeneni süshiba nisung nguli süngo tu agi reptok aser menden reptoker mendaktsü.

OLONG PAITEP # 6584

1		2				3			4
						5			
6				7					
						8			
		9							
								10	
11				12					13
14			15						
						16			
17									
			18						

TIPLÉN

- 1. Tzü atsungtendak - (8)
- 5. Meima / Aochia - (4)
- 6. Atsü nung amshiba oset - (6)
- 8. Taoba mapang atalokbatem - (4)
- 9. Yisu jajaba tzyüim - (5)
- 12. Asoshi / Mechi - (5)
- 14. Yimti tulu - (4)
- 16. Arem ak - (6)
- 17. Te_ _ _ m - (4)
- 18. Mangatetep adoka asatep - (8)

LANGTSÜNGLEN

- 1. Totzü nung aro - (5)
- 2. Ajak - (6)
- 3. Khu abenba shiruru ka - (4)
- 4. Meputep - (5)
- 7. Kati ka aria bilemtep - (7)
- 10. Tebang tanang - (6)
- 11. Nguyutep - (5)
- 13. Ali nung süngjang arem - (5)
- 15. Tetsür tebenjem mapang - (4)

OLONG PAITEP # 6583 TELANGZÜBA

TIPLÉN:

- 1. Karanur, 5. Entsü, 6. Lan, 9.Agi,
- 11. Akong, 12. Ain, 13. Tasen,
- 14. Oru, 17. Ati, 18. Kensü,
- 19. Khrista.

LANGTSÜNGLEN:


- 2. Amang, 3. Repranger, 4. Osü,
- 7. Tajangzük, 8. Rogo, 10. Itsü,
- 15. Ratet, 16. Sen.

NAI-A YA METETTER MA

Alima nung kechisarena chiyungtsü ajunga mapang tatsüka dang lirbo raksadoker saka kodanga meraksaba chiyungtsü ka dang lir aser ibaji ninang mojitzü. Ninang mojitzü indang bushir mongintemi ashiba agi, küm 3000 sülena ninang mojitzüji meraksai chittettsü südi.



Noksa nung meputepi aliba 5 bushiang



Assam nung sorkar ketdangsür 2 apu; Rs 2.32 crore ngutet



Guwahati, July 22, 2023

(Agencies): Assam kübok Dhubri district nung sorkar ketdangsür ana ochimashi ken o nung apu aser ketdangsür ka ket nungi Rs 2.32 crore ngutetogo.

Hokolbarnü apuba ketdangsür ana rongnung kabo Assam Civil Service (ACS) officer ka lir.

Dhubri Zilla Parishad CEO Biswajit Goswami-i contractor ka dang total bill nungi 9% meshi ta Directorate of

Vigilance and Anti-Corruption tsüngdang ken o ka benoka liasü.

Dhubri nung additional district program manager Mrinal Kanti Sarkar aputsü atema ketdangsürtemi tasa ka atong aser CEO office nung pai Rs 30,000 süpokrem meshia agidang apu.

Iba sülen ACS officer Goswami apu. Ketdangsürtemi Goswami'er ki mita reprangdang Rs 2.32

crore angu.

Maneni, kiojen aliba kulikaket, bank accounts aika aser tanga kuli aika ngutetogo.

"Directorate-i anti-corruption drive takok ngua inyaker aser May 10, 2021 nungi tenzüker sorkar mapa inyaker 117 tashi puogo" ta Chief Minister Himanta Biswa Sarma-i ashi.

"Sorkar ketdangsübaren nungi ochimashi samatsütsü indang mapa maneni inyaktsü" ta CM Sarma-isa ashi.

AMUCO-i Mizo nunger dak tashiyim mapa meinyaktsü ayongzük

Imphal, July 22, 2023

(Agencies): All Manipur United Clubs' Organisation (AMUCO)-i nübertem dang Manipur nung Mizo nunger dak tashiyim mapa kecha meinyaktsü metetdaksüogo.

AMUCO president Nando Luwang-i Honibarnü Imphal nung osangbener den jembidang "mebilemdangi mapa inyakba ajanga rara tuluba akümtsü akok" ta ashi.

Mizoram nungi kaketshir aika Manipur reju balala nung azünger ta pai ashi.

Taoba mapang Mizo National Front (MNF) nung züngsemtemi Mizoram nung aliba Meitei nunger dang

lendong nungi jenbutsi atema toktsür aotsü sangoktsüba sülen AMUCO president-i iba osang metetdaksü.

Manipur nung nisung telok kati lisopur tetsür ana mangsa anir senzüba indang video ka social media nung kanga prokshiba ajanga Mizoram nunger jashidaktsü.

Manipur nung ozüing alema inyaker temi tesempatsü mapa inyakba ajanga Mizoram nung Meitei nunger lendongi aitsüsa kümogo ta Hokolbarnü Peace Accord MNF Returnees' Association (PAMRA)-i metetdaksü.


"PAMRA-i osang

sangoktsüba ya Northeastern state tem aser talisa Assam o Meghalaya nung aliba Meitei nunger kanga kümdangtsüla" ta AMUCO president Luwang-isa ashi.

Paisa Centre aser state sorkartem dang Manipur nung kin o kin mepetmesü Mizoram aser tanga northeastern state tem nung madokdaksütsü atema mapa inyaktsü ayongzükogo.

Luwang-isa Mizoram sorkar dang Meitei nunger kümzüka ayutsü ayongzük aser kasa mapang Mizoram sorkari Manipur indang internal affairs nung meinprong masütsü mepishi.

Arunachal police & AR-i ULFA-I züngsem 2 apu



Khonsa, July 22, 2023

(Agencies): Assam Rifles indang Khonsa Battalion aser Arunachal Pradesh Police külemi mita aodang United Liberation Front of Asom (ULFA - Independent) züngsem 2 apu.

Hokolbarnep Arunachal Pradesh kübok Tirap district

nung parnoki Noglo yimtsüing mita aodang ULFA-I züngsem ana apu.

Assam nung mapa tamajung inyaktsü atema telungpurtemi Indo-Myanmar arrtsü adena aruba aputsü atema parnoki iba mapa inyak.

ULFA (I) telungpur ana ya Private Rituraj Gohain (Pulin

Asom) aser Private Montu Neog (Maina Asom) na ta jangaogo. Tena ya Assam nung alir aser yaküm ULFA (I) nung aden.

Taküm Arunachal Pradesh kübok Tirap, Changlang aser Longding (TCL) region nung ULFA (I) telungpur aika puogo aser temai adokogo.

N Korea-i cruise missiles ishika tendangogo

Seoul, Chiteni/July 22 (Agencies): North Korea-i Korean Peninsula anüolen tzüym leni cruise missiles ishika khaketa yokogo, ta South Korea military sangdong ka ajanga metetdaksü.

South Korea tzükümi United States indang nuclear-armed submarine ka aruba anema parnoki tang agi tanabenbuba missile tem tendangogo. South Korea indang Joint Chiefs of Staff (JCS)-i Honibarnü ashiba agi, North Korea-i missile ya anepdang 4:00 ako nungi tenzüka tendanga liasü.

"Onok indang military-i tensa kanga junga meita atadar aser United States den kanga junga sendaktepa inyaksangshiba den kanga junga renemshidar," ta JCS-i ashiba South Korea indang Yonhap News Agency sangdong ka ajanga metetdaksü.

Bodhbarnü North Korea-i linük yimtiba Pyongyang anasa tesem ka nungi short-range ballistic missiles ana khaketa yoka liasü. Iba missile ana ya

km 550 shi yima orr Korean Peninsula anütoklen tzüym nung tsüka liasü.

Missila yima aoba tasazük ya Pyongyang nungi South Korea kübok tzüküm nung aliba yimti Busan na tesünga shia asütsü, kong nuclear-armed submarine; USS Kentucky-i South Korea semdanga liasü. 1980s sülen tang mezüngbuba US indang nuclear-armed submarine kati South Korea semdang asütsü.

Honibarnü khaketa yokba missile ya kobika yima ao iba indang osang tejangja memetet, ta JCS-isa metetdaksü.

North den mangatetep tali akümba mapang ka nung Seoul aser Washington nati tang defence tsütsü inyakyimtem akangshia arudar aser iba amala mapang ka nung missile ya tendangogo. US aser South Korea-i advanced stealth jets tem densema exercise balala ayongzüka agiba den nuclear contingency planning sendena aiben mena arudar.

Kasa mapang nung North Korea indang defence

minister-i Brehostibarnü tekümdangtsü metetdaksüogo aser ashiba agi, South Korea-i Kentucky arua anenzükba ya North-i nuclear amshia amaktsü asoshi tamendakdak ka asütsü akok.

North Korea indang defence minister Kang Sunnam-i ashiba agi, Ohio-class submarine yokba ya nuclear force policy dak sendakba nung DPRK temzüng ozüng nung nuclear hadir amshitsü atema tamendakdak ka küboki aita asütsü akok.

South Korea indang defence ministry-i Hokolbarnü ashiba agi, Kentucky yokba aser Washington aser Seoul na tsünga nuclear contingency planning senden amenba ya North Korea-i amokmerenba nungi jenboa alitsü atema telangzüba agütsüba ka lir.

South Korea indang defence ministry-isa, North Korea-i nuclear amshira telangzüba tesashi agütsütsü aser iba ajanga Kim Jong Un yimsüsüba tembangdaksütsü, ta ashi.

Crimea apu ya military target ka lir: Zelensky



Kyiv, Chiteni/July 22 (Agencies): Ukraine tir Volodymyr Zelensky-i Hokolbarnü ashiba agi, Crimea peninsula aser Russia na sendaktepba apu ajanga yimjung masü saka rara dang bener arutsür, anungji iba ya military target ka lir.

Hombarnü Crimea bridge nung bomb pokloksüba sülen civilian ana tepset aser apu nung lenmang shilem ka mamshitettsüsa aküm, koba taoba küm October ita raksatsüba sülen tawa-ang inyaksangshi tenzüker liasü.

Hombarnü iba apu amakba Ukraine-i pelashishia agizükogo saka ketdangsurtemi iba apu amakba menanzüki liasü. Iba apuba amakba ya Moscow-i Ukraine dak tai tongloksüogo. Crimea ya Russia-i 2014 küm Ukraine ket nungi agi aser Kyiv-i tang Russia nungeri atsünger aliba tesemtem meyipa agütsü merangba mapang ka nung iba tesem ya-a meyipa aginer.

Russia-i yangluba lenmang aser rail apu ya 2018 küm nungi inyaksangshi tenzüka liasü aser

Zelensky-i ashiba agi iba apu ya lenmang ka dang masü.

"Iba lenmang ya rara nung amshitsü atema injangtem belenshiba lenmang ka lir aser injangtem ya anogoshia belenshir. Iba ajanga Crimean peninsula ya militarize sütsür," ta Zelensky-i ashi.

"Onok atema iba lenmang ya tsükchirtem indang facility ka lir koba international temzüng ozüng alema yangluogo. Anungji iba ya onok asoshi target ka lir aser target ka koba ajanga yimjung masü saka rara bener arutsü iba ya raksatsütsü nungdaker," ta pai ashi.

Onir kati ken o ashishiba langzüba mapang Zelensky-i, iba tesem amakba ya Russia-i jangotsü belenshitsü atema tenangzüktepba yanglur aliba nungi atsünginba dak kecha sendaka mali, ta ashi.

Paisa, Russia-i tetenzük nungi jangotsü beneshiba nung tetsükdaksü agütsüogo, ta ashi.

"Iba sülen parnoki Crimea apu dak rangloker tatishitsü ka ama amshia tensa melenshidaksütsü merang. Crimea apu ya mesüra parnoki

tanga kuli kar bushila," ta pai ashi.

Ukraine-i talangka nungi par litsü meyipa agütsü asoshi sentong yanglur aruba taoba ita tenzüko, ajisüka Russia nunger sepaitemi parnoki atsünger aliba tesemtem nung defensive line aika amenokogo aser mine tem aika rema tokja lir, ibayongji inyakyim meyilongi dang aoer, ta Zelensky-i ashi.

Tir-isa, pai aginüba dang nungi inyakyim kanga meyilongiba aoer. Ukraine nunger sepaitemi linük anüolentiplen yimtsüngtem meyipa agütsü aser anütoklen Russia nungeri tawa atsünger aliba tesemtem meyipa agütsü atema rangloker inyakdar.

"Ukraine tejakdangi osdar aser tesem balala meyipa agidar, koba kanga tongtibang lir," ta Zelensky-i ashi.

Longkak aiteremi Baghdad nung Green Zone amaktsü merang

Baghdad, Chiteni/July 22 (Agencies): Honibarnü Baghdad nung nisung noklang aikati yimti kübok Green Zone amaktsü meranga liasü. Iba tesem ya sepaitemi kanga junga meita aliba tesem ka kong foreign embassy tem aser Iraq sorkar indang tongtibang kitem amenoka lir.

Hokolbarnü Denmark nung Iraq embassy jakdang far-right telok kati Quran ka rongtoktsüba indang osang angazükba sülen Honibarnü longkak aiter 1,000 shi adeshi saka security force-i meinshia liasü.

Longkak aiterem Iraqi Shia tamangba yimsü aser yimden yimsüsüba nung lenir Muqtada al-Sadr pusema yimyim ayim aser iba den lenir indang noksa

MULUNGNEN O



Asür imkongkumzuk
29/03/1979 - 10/07/2023

Asür Imkongkumzuk Molungkimong, Shitikolak Ward Tuli, pa shirangdang aser asüba anogo nungi tenzüka lepko tatem tashi tembar, medemer, kiyonger, lokti balala, Kangtsung aser Molungkimong nütüng nübori anir Tuli nung aliba ward balala aser jila balala nungi onok den asüko lemsatepa nenok temeim nützü, nübo aser rongsen tulu bener onokden yaritepa aruba temeim onoki kodanga mamatsü ta kangasa pelaba lemsateper. Tongtipangsa shirnoki sentsü tashi tatok agütsüogo, iba temeim aser yimlibilem yabo onokdak malangba kodanga mamatetba temeim tulu ta züngshir. Anungji tulusang aser talubo akasang Tsüngremi nenok temeim mapa tajung asoshi moajang ta ozü sarasadem.

~ Temeim Kinunger.

Office of the
Chuchuyimlang Likokpong Aso Bendang alirTelongjem
Dimapur-797112

Tenügsang Molungnen O

Obula semchir shirnoki nendaka inyakba nung takok konang aser jenjang balala ajangzüktetogo nenok ajak dang temulong achiba lemsateper aser Tsüngrem tenüng asanger.

1. **Mr. Moatemjen Jamir** S/o Mr. & Mrs. Putiyanger. ADO (Apprentice Development officer) LIC.
2. **Mr. Sendongnüngsang Ao** S/o Mr. & Mrs. Opangtemsi. NSSB 2022- Store Keeper, Dept of food & Civil Supplies
3. **Mr. Moalong Jamir** S/o Mr. & Mrs. Ozüngtemjen Jamir. NSSB 2022 - LDA Cum Computer Assistant, Dept of Environment, Forest & Climate Change.
4. **Mr. Akumyanger** S/o Mr. & Mrs. Sentiwati. NSSB 2022 - Agriculture Field Assistant, Dept of Agriculture.

Sd/-
President CLABT
Opangtemsi

Sd/-
Secretary CLABT
Imnaimba Jamir

OFFICE OF THE
SATSÜKBA VILLAGE COUNCIL
P.O: MANGKOLEMBA, Dist. MOKOKCHUNG,
NAGALAND

SANGDONGER

Mr. Limasünep (S/o. Lt. Bendangmeri) - i yimten tsüzüng-ozüng kübok tashi anga meliteti yimten anema aibelen nung 4th July 2023 anogo nungi pa Satsükba yimten nungi jendoker. Tang nungi pa Satsükba nunger masü aser Satsükba Yim tenüng amshitsü memelar.

asir pai tenzüka movement Iraq wako rongtoktsüba ya indang wako aser Iraq indang kokoa aitsür.

Security force temi Green Sorkarisa, alima kintem dang iba inyakyim koba ajanga lokti nung yimjung aser libalirotsü nung kongshir iba anema nokdaksü mepeshia liasü.

Danish media sangdong balala Tanga sangdong ka ajanga, Swedish embassy nung kechi atalokogo iba ya onoki tanaben ataloktsü memelatsü ta ashiba AFP news agency sangdong ka ajanga metetdaksü.

Danish media sangdong balala Tanga tatalokba ka nung longkak aiteremi Iraq kübok Basrah governorate nung humanitarian organisation Danish Refugee Council indang headquarters nung mi senokja liasü, ta local media sangdong balala ajanga metetdaksü.

Copenhagen nung tatalokba ya Iraqi Ministry of Foreign Affairs-i aitsüogo. Ministry-i Honibarnü ashiba agi, Denmark nung Iraq embassy jakdang Holy Quran aser Republic of (Maneni tapak 8 nung...)

Public College Dimapur-i 1st Inter-College Champions Trophy kokogo



Dimapur, Chiteni/July 22 (TYO): Honibarnü Nagaland Cricket Stadium, Sovima nung 1buba Inter-College Champions Trophy final Public College Dimapur-i run 119 agi Government College Dimapur kokogo

Asaya akoktsü atema run 189 yanglutsü nungdaka Dimapur Government College pur batting amen ajisüaka parnok over 11.2 nung asayar ajak out ser run 69 dang yangluteta liasü.

Asaya nung mezüing batting amenba sülen Public College Dimapur nung asayar Saurav Kumar-i ball 33 nung run 52 yanglua par team-i asayar 9 out ser run 188 yangluba nung teyari tulu agüja liasü. Asaya nung Vijay Paswant-ia run 52 yanglua liasü.

DGC bowler tenet rongnungi Saurav-i dang Public College batsman tem nem timtem agüja liasü. Parnok rongnungi Chandemo-ia wicket 2 agi.

Run arishiba mapang Dimapur Government College nung opener mezüingbuba over nung out süatok. Parnok rongnungi Suraj (25 runs) aser Saurav (13 runs) nati dang tera junga asaya liasü.

Iba asaya nung Public College Dimapur nung bowler Vijay Paswant-i wicket 5 agi aser pa nem man of the Match naroküm agüja liasü. Saurav aser Banti natia wicket kaka agia liasü.

Asayamung shibangba sentong nung Nagaland Industrial Development Corporation mendenbuba Kvulo Lorin alakteta jaoker liasü aser

pai takok angurtem nem sempet lemja liasü.

Sempet balala agizükertem:

Winner : Public College Dimapur
Runner Up : Dimapur Government College
Man of the Match (Final): Vijay Paswant (Public College Dimapur)

Best Batsman: Alok Sharma (Dimapur Government College)

Best Bowler: Vijay Paswant (Public College Dimapur)

Player of the Tournamnet : Saurav Kumar (Public College Dimapur)

Asayamung indang tatsü agi:

Total No. of Matches: 15

Total run scored: 3315 runs

Total Wickets fallen: 212 wickets

No. of 6's : 43

No. of 4's : 314

50's : 12.

Korea Open: Satwiksairaj aser Chirag na final-i iogo

Chiteni/July 22, 2023 (Agencies): Tang asaya aliba Korea Open Super 500 tournament nung India nung tebur tarep asayar Satwiksairaj Rankireddy aser Chirag Shetty nati China nung second seed tarep Wei Keng Liang aser Chang Wang na koka final-i iogo. Wei aser Chang na ya 2021 world champions lir.

Satwiksairaj aser Chirag nati Wei Keng Liang aser Chang Wang na ya 21-15, 24-22 agi koka liasü. Tarep ana tsüingda ghonda ka ser minute 20 asaya liasü.

Satwiksairaj aser Chirag nati taküm tang tashi nung Indonesia Super 1000 aser Swiss Open Super 500 koka lir.

China nung tarep shirnoki taküm Thailand aser India Open kokogo tenati India nung tarep den ya anaben asayaba anabenprongla koker liasü, ajisüaka tang iba asayamung

nung India nung tarep yagi kanga junga asaya-a asaya ako aser asayamung tanabuba atonga final tongtetogo.

Asaya nung telok anapronglai rally tatsütsü asaya tenzük aser point meneptepa dang asaya tenzüa ken 3-3 aser iba sülen 5-5 ta liasü.

Iba sülen India nung tarep ya 7-5 agi tejkadang aküm aser break tashi nung tena maneni point asem agi tejkadang liasü. Break sülen Satwiksairaj aser Chirag na maneni 14-8 agi tejkadang aküm aser iba sülen 17-11, 19-12 ta tenasa tejkadang ser asayaba sülen asaya akok.

Tanaba game-a mezüingbuba den kasa dang liasü aser point 8-8 tashi telok anapronglai point melentepa ngua kanga toktepa asaya. Ajisüaka China nung asayartem yagi aibelen kar menaba sülen India nung tarep ya 11-8 agi tejkadang

aküm.

Asaya nung Satwiksairaj aser Chirag na tejkadang ser asayaka Wei aser Chang nati tena kanga talangkabo pila meyoki asaya.

Telok ana tsüingda maneni toktepa asaya aser point 18-18 ta kasasa akümba sülenbo telok anapronglai point kaka melentepa nguyonga atu aser 22-22 aliba mapang India nung tarep yagi point ana atonga nguteta asaya koka liasü.

Satwiksairaj aser Chirag na final nung Indonesia nung tarep Fajar Alfian o Muhammad Rian Ardianto na mesüra South Korea nung tarep Kang Min Hyuk o Seo Seung Jae na den asayatsü.

Semifinal asaya nung Satwiksairaj aser Chirag nati Japan nung tarep Takuro Hoki aser Yugo Kobayashi na 21-14 21-17 agi koka liasü.

Longkak aiteremi Baghdad nung Green...

Sweden nung Quran tanabenbuba mezüingmeshia amshiba sülen Baghdad nung Swedish embassy aser rongtoktsüba sülen anogo ana lir Honibarnü iba ya ataloka liasü.

Iba tatalokba sülen Iraq

Ato Kilonser-i Sweden kecha tesendaktep mayutsü atema telemtetba agia liasü aser Middle East nung Muslim nungeri amokbaner aliba linüktemi iba inyakyim ya aija liasü.

Sweden nung ya Iraq

(Tapak 7 nungi...)

nung Khristan Salwan Momika-i Quran ya rongtokja liasü. Paisa June 28 nü Quran ka tongtoktsü aser iba ajanga Iraq nung nüburtemi longkak ait aser Muslim nunger linüktemi aija liasü.

Asiad Trials ki shibanga yur asayatsü

Chiteni/July 22, 2023

(Agencies): IOA-i shimba ad-hoc committee-i, Asian Games atema wrestling trials ki shibanga yur agitsü atema telemtetba agiogo. Hokolbarnü IG Stadium nung asayar tsürapurtem aser panel züingsemem tsüingda mangatetep adokba sülen iba telemtetba agia liasü.

Olympic medallist Bajrang Punia (65 kg) aser world medallist Vinesh Phogat (53 kg) na trail nung shilem magi indang indanga iba asayamung asayatsü atema maongka agütsüba asoshi wrestler aser tsürapurtemi meita adoka trail nung shilem magitsü amokmerena liasü.

Wrestler tem tsürapurtem trial agiba tesemi aru aser ad-hoc panel den asatep tenzük. Parnoki ashiba agi, iba telemtetba agiba ya tim masü.

World U20 champion Antim Panghal aser wrestler Vikas Kaliraman tebu Subhash Kaliraman aser ad-hoc panel züingsem ka kanga mejungi olangtepa liasü.

Tebilemstü keta aliba reprangteta ad-hoc panel-i, trail agiba mapang terpranger shinga marudaktsütsü atema telemtetba agia liasü.

Wrestler tem ajak parnok coach aser masseur-i dang meiner arutettsü.

Ad-hoc panel züingsem Gian

Singh-i ashiba agi, hall telungi shinga maitdaktsütsü atema iba tesem indang DCP dang sepaitem yoktsü mepeshia asüingdangogo.

Ad-hoc committee-i Vinesh aser Bajrang na trail nung shilem magi-i asayatsü maongka agütsüba sülen Asian Games atema trail dak sendakba nung mangatetep tulu adoka liasü.

Tena iba trail nung shilem magidaktsüba sülen Antim aser Sujeet Kalkal amala lanur wrestler temi ajak kasasa trail agitsü khanga Delhi High Court nung ken o benoka liasü.

Olympic medallist Sakshi Malik aser Yogeshwar Dutt natia ad-hoc panel telemtetba ya ashishiogo.

London Olympic medallist Yogeshwar, shiba IOA Athletes Committee züingsem ka lir, pai coach aser ad-hoc panel züingsem Singh aser Ashok Garg na den aiben sensaksemogo aser lanur asayartem nem parnok tangutsü tim maongka magütsüba ya tim masü ta shia parnok telemtetba m e l e n s h i d a k t s ü t s ü merangdanga liasü.

Kasa mapang nung ad-hoc panel member Singh-i, Belgrade, Serbia nung September ita asayatsü aliba World Championships atema trails taruba ita agitsü ta metetdaktsü.

Pierre-Emerick Aubameyang Olympique de Marseille-i ogo

Chiteni/July 22, 2023

(Agencies): France nung football club Olympique de Marseille-i Gabon nung striker Pierre-Emerick Aubameyang Chelsea nungi alizükba osang metetdaktsüogo.

Arishi küm 34 taain asayar ya Chelsea nung junga masayatetba sülen tang club melenshiogo. British media sangdong balala ajanga ashiba agi, Premier League club yagi Aubameyang den tenanzüktepba yanglur aliba küm ka anunga lia thija liasü.

Chelsea nungi asayaba mapang Aubameyang Premier League nung asaya pongu nung dang tetenzük nungi asaya aser October ita Crystal Palace den asayaba mapang dang goal ka idakja liasü. Pai Champions League group stage nungbo goal ana tashi idakja liasü. Ajisüaka pa iba asayamung knockout stage nungbo masayadaktsü kechiyong pa asayaba yimya jungrara masü asü.

Asayar tanga club-i aoba dak sendakba nung Chelsea-i

Aubameyang dang kanga pelaba lemsatepogo aser pa career nung jenjang tasen ka agiba mapang takok nung aotsü imlaja ataba lemsatepa liasü.

P i e r r e - E m e r i c k Aubameyang ya taoba mapang 2010 nungi 2013 tashi France nung St Etienne nungi season asem asayaogo aser küm ter sülen pa maneni France-i meyipa aoer. Kasa mapang nung pa Ligue 1 club Lille aser AS Monaco nungia asayaogo. Iba sülen pa Borussia Dortmund aser Arsenal nung kanga takok ngua asaya liasü.

Aubameyang ya Gabon nung rongnungi goal timtiba idaktsüba asayar lir. Pai international asaya 73 nung goal 30 idaktsür lir. Pa nem 2015 küm African Footballer of the Year naroküm dena agütsüogo.

2022 küm pai international asaya nungi anentsü atema telemtetba agi, ajisüaka pai taküm küm tetenzüklen pa maneni Gabonese national team nungi asayatsü ta sangdonga liasü.

BILEMDANGANG

"Timtem toushijia teti asoshi masü; ajia süitemtsü."